



30. januar 2022

UPA 2022/52

Inatsisartut Suleriaasianni § 36 malillugu apeqquteqaat aallaavigalugu oqallinnissamik imaattumik siunnersueteqarpunga:

Kina kalaaliua – kalaallisut kinaassuseqarneq qanoq paasisarparput, pillugit apeqquteqaat aallaavigalugu oqallinnissamik siunnersuut.

(Naleqqap Inatsisartuni Ilaasortaatitai)

Apeqquteqaammut oqittumik akissutaasinnaasumik nassaassaqarunangilaq, qulequtsiunneqartup misigissuserpassuavut imaannaanngitsut qaffakaatissinnaagunarpai. Oqallississiamik taamaattumik saqqummiussaqarnikkut avissaartuuttsinissaq siunertarinngilara, kisiannili kissaatigaara, eqqarsaaersuutaasinnaasut piviusorsiortut oqallisigalugit aallarteriissasugut, piffissammi arlaani kalaallit uagut ataatsimoortumik inatsisitigut tunngavissarput isummerfigisussaavarput namminiilivinnis-sarpullu taassisutigalugu.

Namminersorneq pillugu inatsit naapertorlugu inuiaat kalaallit nunat tamat akornanni inatsisit malillugit inuiaapput namminneq aalajangiisinnaassusillit. Taamatut oqaasertaliisimanermi pisinnaatitaaffiit assigiinngitsut marluk najoqqutarineqarput, tassalu nunap inoqqaavisut nunasiaasimasutullu pisinnaatitaaffiit. Nunap inoqqaavisut immitsinnut illersortariaqanngilagut tamatumani lu pingaaruteqarpoq paassisallugu, naalagaaffiup namminissarsiorneranut illersugaa-nerput Namminersorneq pillugu inatsimmi tunngaveqareermat. Taamatut aaqqiisimaneq annertuitigut naalagaaffimmuinnaq pitsaasunani, aamma inuiannut kalaallinut aaqqiineruvoq pitsaasoq.

Nunat inoqqaavisa pisinnaatitaaffii naalagaaffiup iluani illersugaanissamut tunngapput, imminut tamakkiisumik oqaasissaqarfigineq innarlernagu atuutiinnarlugu. Danmarkimi oqartussat kalaallit Danmarkip killeqarfia isluani nunap inoqqaavisut isigivaat, taamaattumillu Nunat inoqqaavi inuiaallu naggueqatigiit naalagaaffinni namminersortuniittut pillugit ILO-p isumaqatigiissutaanut (Isumaqatigiissut nr. 169, 1989-imeersoq)¹ atatillugu taagut Inuit atorneqarluni.

Inuiaalli kalaallit² taamaattoq aamma nunasiaataanikuupput nammineq aalajangiinissamut pisinnaatitaaffeqartut. Nammineq aalajangiinissamut pisinnaatitaaffimmik piumasaqarneq, nunasiatajunnaarsitsinissamik suliaqarnerup ilagiinnarpaa, tamannalu nukigalugu namminersulivinnissamik kissaateqarnermik tunulequtaalluni, Namminersorneq pillugu inatsimmilu kapitali arfineqpingajuanni oqaasertaliissamut tunngaviliilluni. Namminersorneq pillugu inatsit

¹ Ass. takujuk Københavnimi nunanut allanut ministeriaqarfiup DANIDA-lu aaqqissugaannik misilitakkat periarfissallu pillugit isumasioqatigiissitsinerani Nunanut inoqqaavinik tapersuineq ineriertortitsinermut ministerip Poul Nielsonip oqalugiaataa.

² Taagut kalaaleq atorneqartarpoq Inuit oqaluttuariniarlugit



ajunngitsumik siunniussaqarluarluni aamma isertuanngitsunik amigaateqarpoq, tamakkualu Inatsisartuniit suliassatut piukkunneqarlutik.

Ullut tamaasa apeqqutigineqaqattaartoq tassaavoq, naak naalakkersuinikkut qaqikkumaneqanngik-kaluartoq, oqallissaarinertullusooq apeqqutigineqaqattaartartoq:

Inuaat kalaallit, nunat tamat akornanni inatsisit malillugit inuiattut akuerineqarsimasut, kikkuugamik? Illit? Uanga? Alla? Kalaallisut inuaassuseqarneq oqaatsnik tunngaveqarpa? Oqaluttuarisaanermik? Ilagisaatitigut (genitigut) imaluunniit sumi najugaqarnermik?

Nunarsuarmioqatigiinnut annertunerujartuinnartumik peqataanitsinni nunatsinni assigiinngisitaarneq, peqatigitillugulu naggueqatigiittut Inuttut illersugaanerput, nammineq ineriartortitassaraarput.

Innuttaasuni assigiinngitsunik immikkut inuaassuseqarluni ullumi inooqataanerup ersarissumik takutippaa nunamut attuumassuteqartoqarsinnaammat naggueqatigiinnit Inunnit kingoqqisuunngikkaluarluni. Tamattami inuaqatigiinnik sullisisut ataasiakkaarlugit nalunngereerpavut kikkuusut, Inuit kinguaarippassuk imaluunniit naamik.

Soorlu Danmarkip naalagaaffiata tunngaviusumik inatsisaani §44-mi nunami allamiut periarfissinneqartut inatsisitigut innuttaassuseqalersinnaanissaminnt, taamaalilluta aamma siunissami nunatsinni inatsisitigut innuttaassuseqalersinnaanissaq periarfissaasariaqarpoq, nunatsinni ineriartornissamik kissaateqarneq taamaaliornikkut erseqqissarlugu. Soorlulusooq nunarput namminersulivipat aamma soorunami inuppassuit kissaatigisinnaagaat danskisut innuttaassusertik tigummiinnarussullugu, taamaattoq aamma ilimanarpoq ilaasa nunatta naalagaaffia peqatigerusussagaat, marloqiusamilluunniit innuttaassuseqarnissartik kissaatigalugu.

Danmarkimi naalagaaffimmi innuttaassuseqalernissamut piumasaqaataasut massakkut tikinnianngilakka, taamaattoq paasinnillunga oqaatigissavara.

Ullumikkut takusinnaavarput kalaaliuneq najukkamut oqaatsinulluunniit tunngatinneqanngimmat, ilalisaatinulli tunngatinneqarnerulluni. Tassa naggueqatigiinnut "Inunnut" ilaanermut. Tamanna aamma paasinlarluarpoq "naalagaaffeqatigiit" sinnera qiviaraanni, tassani danskeqarlunilu savalimmiormioqarmat.

Tamanna USA-mi akerlerluinnaaniippoq, taakan nunap inoqqaavi misilitseqqaartarmata aammalu ilalisaatitigut kinaassuseq minnerpaamik 1/16 takutissinnaasariaqarlugu, nalitsinnili taamatut immikkoortitsineq nunatsinni isumaqarpallaarani. Minnerunngitsumik Namminersorneq pillugu inatsimmi §21 eqqarsaatigalugu inuaat kalaallit naalagaaffiannik pilersitsinikkut kiap "kalaaliusutut" taaneqarsinnaaneranut nunat inoqqaavinik illersuineq atorsinnaajunnaassavarput.

§ 21, imm. 4 naapertorlugu aamma nunat inuaqatigiillu nunasiaataasimasut kiffaanngissuseqalernissat pillugu Naalagaaffiit Peqatigiit 1960-imi aalajangersagaat naapertorlugu inuaat kalaallit nunaminnut tamakkiisumik oqartussaassuseqalernissaasa tungaanut nunat inoqqaavisa pisinnaatitaaf-fiisa ukiorpassuarnilu ilaatigut ICC-p sorsuutigisimasaasa qularnaarneqarnissaat pingaaruteqarpoq.



Inuiaat kalaallit naalagaaffiannik pilersitsinikkut inuaassuseqalernissatta tungaanut kinaassutsimik pilersitsisariaqarpugut nunarsuarmioqatigiinnit ilisimaneqartumik. Soorlu aamma danskit Danmarkimiittut, svenskit Sverigemiittut, taava uagut namminneq kina "kalaaliunersoq" aalajangersartussaavarpuit.

Iluarsiissutitut qaninnerpaaq tassaasinnaavoq inuit qitiusumik nalunaarsorsimaffiata CPR-ip aallaaviginissa, tassami inuit toqusut, tammartut nunamulluunniit allamut nuuttut CPR-imiiginnartarmata. Ullumikkut CPR-imi paasissutissani inuit 8,4 mio.-it missaat pineqarput³. Tassanimi ilaqtariissuseq nalunaarsugaavoq, kisiannili oqaatigineqareersutut ullutsinni nunatsinni ilaqtariissuseq uppernarsarniarlugu isumaqarpallaarani 1953-imut siusinnerusumulluunniit utersaariarnissaq. Angajoqqaavit arlaat nunatsinni inunngorsimappat aammalu taakkua angajoqqaavini ataaseq nunatsinni inunngorsimappat taava ilimagissavat ILLIT aamma kalaaliugavit.

Allatut oqaatigalugu - Danskisut innuttaassuseqaruit angajoqqaatillu/siuatit tamarmik danskiunngippata/savalimmormiuunngippata imaluunniit nunani allaniit nuunnerunngippata/ meeravissiaanngippata, taava kalaaliunissat ilimanarluiunnarpoq.

Inuiaat kalaallit perarfissinneqanngisaannarsimapput perarfissarpassuit akornanni toqqaassallutik, piumasarineqartut naapertorlugit, aammalumi eqqortumik siunnersorneqarlutik aperineqaratik ilangutsitaaneq pillugu ammalu namminersortuunngitsutut nalilersugaanerup taamaatiinnar-neqarmat 1953-imi. Inuiaat kalaallit toqqaannartumik toqqaannaannngitsumilluunniit inuiattut inisisimanertik pillugu nammineq aalajangigaqarnikuunngillat Danmarkimullu ilangutsitaanermi naalagaaffiup ataani inisisimalernertik isummersorfigisimanagu.

Inuiaat kalaallit nunaminnik §21 imm. 4 malillugu tamakkiisumik oqartussaaffigilernissaata tungaanut, aamma nunat inuiaallu nunasiaataasimasut kiffaanngissuseqalernissaat pillugu Naalagaaffiit Peqatigiit aalajangersagaat 1960-imeersoq naapertorlugu, inuit nunap inoqqaavisut pisinnaatitaaffiisa minnerunngitsumillu inuiannut allanut akulerutsitaannginnissaata qularnaerne-qarnissaat pingaaruteqarput.

Tamatununnga atatillugu Namminersorneq pillugu inatsit Inunnik marloqiusamik illersuisuuvvoq, kinaassutsimik nunarsuaq tamakkerlugu akuerineqartumik pilersitsinissamut perarfissiisoq.

Taamatut oqaaseqarluta oqallisilluarnissassinnik kissaallusi.

³ <https://cpr.dk/borgere/hvad-staar-der-om-mig-i-cpr-registerindsigt/hvad-og-hvem-er-registreret-i-cpr-og-hvem-opdaterer-oplysninger-om-dig-i-cpr/>